

IN SVENDITE ANCJE SAN PIERI DI CJARGNE?

Sperin che no setí vere, ma lis brutis gnovis, magari cussì no, e àn sinpri mani L'ultime, par cumò, e riguarde la glesie-mari di San Pieri, sente vescovîl fint' e vignude dai langobarz, capitolâr fint al 1812 e che cumò e je la sente dal ausiliâr di Udin bons. Pieri Brollo.

Poben si à sintût di buine bande che il vescul Battisti al sta tratant cui fraris capucins par fâ su un gabiot a uso convent e podopo ur dares a lôr la glesie e dut il cjanâl.

La robe, stranbe cence fin, e à fondamente.

Nol è di vuè che il vescul di Udin al à tranis cui siei fraris padoans (viôt la cuistion dal ospedâl di Udin).

Duc' chesc' pastroc's a son tassêi di un disegn ben precîs: svinidrí ogni olme de nestre storie patriarcjâl e originalitât gleseastiche. Cussì nus àn svendude, une a la volte, Madone di Mont, Madone di Gracie, la Mont Sante di Lussari; e àn gafade la abazie di Mueç e a gafaran chê di Rosacis. Cumò e je rivade la volte di San Pieri. In cheste maniere il vescul di Udin al jentre ancjemò plui in cumunion (ledrose) cul vescul-frari di Gurisse ch'al à slungjade la çate su la basiliche-mari di Aquilee. In cheste continuitât di disastros, i vescui di vuè si palesin fîs drez di chei paris ladrons ch'a àn fruçade la sente di Aquilee.

I fraris e lis muiniis a stan cjapant par intajade duc' i lûcs plui significatîfs de nestre storie, uniche ricjece religjose e culturâl che nus è restade, par fânt «pizeriis spirituâls», sul stanp di ce che i talians in gjenerâl e i meridionâi in particolâr e àn fat cui nestrîs anbiens e tratoriis.

Il danp al è plui orent di ce che si podares pensâ. I fraris e lis muiniis a ingolosissin la biade int cu lis lôr buteghis di nainis e nainutis e santuz dai lôr ordins, cun meracui e graciis a comant, e cussì a finissin cul gjavâi ancje chel sclip di dignitât che j ere restade te sô dimension religjose. A contentin la disperazion cence sostentâ il cûr e nudrî il spirt, e chest al è un delit perfet, parceche al zuje su lis disgraciis dai puars. I fraris, ch'a vivin di agnoruns cui bêz dai furlans, no si son nancje nacuarçûz di jessi in Friûl, là che e esist une storie ancje religjose e là che ancje Diu al à un'âtre ghigne. Invessit di insedâsi te nestre realtât, a "provinciali sin" il nestri mont sul stanp de lôr provincie, ridusinlu a une braide de lôr cjase-mari.

La presince dai fraris come rispueste 'e mancjance di predis e jè rude ipocrisie e falsetât. Se il vescul nol à predis pe Cjargne, che ju gjavi de curie e a Udin; no mandâ colonisadôrs framieç di int za colonisade in dut. S'al ûl dâj vite 'e glesie di san Pieri, ch'al torni a meti su il cjapitul! Chest vandalîsin spirituâl al vares di fâ berlâ i clas. Sperin di sintî

amancul la vòs dai predis de Cjargne che, rivant i fraris, a son i prins a stralozâ.

Sperin di sintî la vòs dal prevost di Zuj, che si à lassât puartâ vie lis statuis dai laris e cumò si lasse puartâ vie ancje la glesie dai fraris. Sperin di sintî ancje la vòs dal titolâr Brollo, ch'al vares di rivâ a cjatâ cuatri predis che j fasin corone atôr de sô sente. Sperin soledut di sintî la vòs libare e luterane de Cjargne, dai miôrs cjargnêi, chei che magari no batin la glesie ma a san trop inpuartante ch'è je une religjon insedade te storie e te culture e trop danp ch'è pò dâ, tune int rassegnade e cun pocje sperance, une religjon di santuz e di devoziions cence vues.

Il vescul al palese ancjemò une volte di no vê capît de nestre realtât. Se nol rive a contentânus, cun tantis ch'and'â tentadis, ch'al lassi stâ, che si rangjn instes. Ma no fânus dispiez cussì pelôs. Ce j vino fat mo?

Si vares di pratindi, di un pastôr, un tic di rispjet pe sô int, di atenzion pal so trop, di sensibilitât pe realtât là che la provedense o il gjaul lu à distinât. Soredut no àn di ritignîsi parons espotics di une robe che no jé lôr, che le àn cjatade e ch'a restarà ancje dopo di lôr. E ch'a no stetin a vignî fûr cu la pantiane dai carismis là ch'a son dome zucs o, piês ancjemò, cul Spirtu Sant, che in chestis robatis nol jentre nancje a fracâlu cun dôs mans.

S'a vuelin rispjet, ch'a scomencin cul rispjetânus. Nô e la nestre tiere.